

Adia «standby» – hallo Degen

Dus onns han ils fans ed ils organisaturs digl Open Air Lumnezia stuiu spitgar. En in meins eis ei finalmein aschi lunsch, il plaun a Degen semida en in areal da festival e la musica fa stremblir la val.

SUSI ROTHMUND/FMR

Dils 21 entochen ils 23 da fenadur 2022 beneventa igl Open Air Lumnezia rodund 18 500 hosps. Ils bigliets eran vendi ora gia avon dus onns. Suenter la pausa sfurzada pervia dalla pandemia ha *Norbert Cavegn*, il president dil comite d'organisaziun, negin dubi ch'ei funcziuni quella ga: «Nus essan stai dus onns el modus da «standby», ussa selegrein nus ed essan fetg motivai.» Suenter dus festivals annullai hagi ei denton druvau empau per vegnir sin turas. Tenor Cavegn eis ei mo pusseivel d'organisar in tal festival sut las cundiziuns normalas. Far tener distanza al festival fussi nunpusseivel, la glieud seigi denton sensibilisada e perquei sefidien ei dalla responsabladad persunala da mintgin. Lockdown e restricziuns seigien il mument negin tema e da tals scenaris gnanc discuorien els.

«Ei ha druvau empau per vegnir sin turas»

Sco bia autras occurrenzas e festivals hai era buc dau igl Open Air Lumnezia il 2020 ed il 2021. Uonn vesa ei ora bein pil festival che ha liug dils 21 tochen ils 23 da fenadur ed ils rodund 18 500 hosps pon selegrar.

SUSI ROTHMUND/FMR

En in meins ha la Lumnezia 18 500 habitontas e habitonts dapli – silmeins per treis dis. Dils 21 entochen ils 23 da fenadur ha igl Open Air Lumnezia finalmein puspei liug ed ils visitaders pon guder la bun'atmosfera, la musica e la cumpignia. Il comite d'organisaziun ei vid las davosas preparativas. La FMR ha discurreiu cun *Norbert Cavegn* che presidiescha il comite, per intervegnir co ei va culs organisaturs in meins avon ch'ei mondi liber.

FMR: Igl Open Air Lumnezia stat avon porta, co vai cun Vus, ughegeis insumma da selegrar?

Norbert Cavegn: Gie, nus dil comite d'organisaziun selegrein ed essan voll motivai. Igl ei bien ch'igl ei puspei aschi lunsch.

Fageis buc quitaus che la pandemia pudess la fin finala tuttina aunc ina ga lavagar tut?

Da tals scenaris discurreiu nus buc. Lockdown e restricziuns ein negin tema, quei datti buc il mument.

E mesiras da segirtad ni schurmetg en connex cul coronavirus?

In festival che ha liug ordaviert funcziuna buc cun talas restricziuns, quei ston ins veser realistic. Nies Open Air ha liug el format normal. La glied ei sensibilisada e mintgin ei responsabels per sesez. Nus savein aunc metter si melli desinfectonts e detg placativ era 5000 tonnas pupi da hisli ch'ei midass nuot vid il secuntener dils visitaders. Igl ei buc pusseivel da far seivs per far tener distanza e metter en leu la glied sco nuorsas. Quei ei buc la realitad e funcziunass era buc.

Duas ga haveis gia stuiu annullar igl Open Air, co ei quei da finalmein saver menar atras el?

Il 2020 ei quei stau fetg curios. Il fevrer e mars cu la pandemia ei sederasada ed ei ha dau il lockdown savevan nus nuota propi tgei tertgar e quintavan ch'ei varghi silla stad e nus possien menar atras il festival. Mo lu ei tut vegniu auter – mintgin sa tgei ch'ei capitau ils davos dus onns. Pli ditg ch'ei mava e pli fetg ch'jeu hai viu ch'ei mass era senza igl Open Air Lumnezia, oravontut sch'ins fa aunc autras caussas dasperas. Duront quei temps essan nus stai el modus da «standby». Nus essan adina stai en contact culla scena da festivals, havein observau la situaziun e persequitau il svilup dalla pandemia. Il december vargau ei tut vegniu pli concret, mo ei ha druvau empau per vegnir sin turas e per realisar ch'ei pudess gartegiar. Ussa essan denton gia vid planisar ed organisar ils detagls.

Sin tgei selegreis Vus il pli fetg?

Sigl entir Open Air sco tal, che la glied vegn puspei en Lumnezia e sa guder in festival da treis dis pil qual ei han gia dapi dus onns ils tickets. Ei astgan selegrar sin in bien program musical, sils concerts ch'eran previ gia il 2020. Ils davos dus onns havein nus adina puspei giu da contrahar cullas bands, mo la fin finala eis ei reussiu da mantener il program previu.

Apropos program. Vus haveis segir viu conta critica ch'il festival Moon and Stars a Locarno ha survegniu perquei che neginas dunnas vegnan a star leu uonn sin tribuna. En Lumnezia ha ei singulas dunnas el program, ellas ein denton era leu propi ella minoritad.

Quei ei in tema fetg delicat, la realitad ei denton bia ga outra che quei che biars havessen bugen. En realitad fa la pluralitad dallas bands musica cun dapli umens che dunnas. In Open Air cun in nivel sco il nies sto mirar da survegnir bands cun ina certa qualitat e cheu san ins buc aunc mirar sch'igl ei umens ni dunnas. Nus stuein cudischar las gruppas ch'ein disponiblas, pagablas e che fan senn per nies program musical. Nus havessen segir era buc in problem da cudischar 19 bands mo da dunnas, quei ei denton buc la realitad. Igl ei buc in concert sin giavisch.

Dat ei novaziuns ni midadas agl Open Air Lumnezia?

La gronda midada era gia prevedida pil 2020, numnadamein ch'ei dat buca pli ina tribuna pintga e che tuts concerts – era quels dalla gievgia – han liug silla tribuna gronda. Autras novaziuns havein nus fatg arisguard il conservar e sviluppar igl existent. Per exempel cun metter novas lingias sutterranas per aua ed electricitad. Quei levgescha il baghegiar si e giu l'infrastructura. Ei setracta da novaziuns ch'il consument vesa buc mo ein impurtontas pils organisaturs e la segirtad.

Malgrad urezis eis ei bravamein schetg il mument en Svizra, stueis Vus prender mesiras arisguard prighel da fiug?

Nus spitgein giu (ri). Ins sa gie ch'igl ei il bia ualti bletsch cu igl Open Air Lumnezia ha liug. Jeu fuss leds sch'ei fagess quella ga aura normala. In tec bial'aura fuss flot. Pil mument fagein buc memia bia patratgs davart l'aura. Sch'ei drova mesiras specialas vegnan il cantun e la vischnaunca a communicar quei. Sin nies areal dil festival e da campar eis ei aschia ni aschia scumandau da far fiugs aviarts.

Ils bigliets eran gia vendi ora avon dus onns. Co pudeis Vus consolar quels che han buc pudiu tier in?

Nus duvrein 500 voluntarias e voluntaris, enzacons paucs mauncan aunc. Pia san ei s'annunziar sco voluntaris e han – sper lur engaschi – access duront treis dis. Ei dat adina persunas che san buc visitar il festival e vendan lur bigliets. Nus admonin denton d'esser fetg precauts, ei dat dabia cugliuns. Cumprei gie buc sin «viagogo.ch»! La plattafuorma che nus savein perencunter cussegljar ei «fansale.ch», quei ei pli serius ed ils prezis era pli mudests.

Concurrenza per in pass

La FMR astga regalar oz ad enzatgi in pass da treis dis pigl Open Air Lumnezia 2022. Tgi che vul empruar siu cletg sa telefonar oz suentermiezdi dallas 13.10 tochen las 13.15 a 079 432 82 26. L'emprema ni igl emprem che po atras gudogna.